



# education

Department:  
Education  
**REPUBLIC OF SOUTH AFRICA**

## **NATIONAL SENIOR CERTIFICATE**

**LIBANGA 12**

**SISWATI LULWIMI LWASEKHAYA (HL)**

**LIPHEPHA LESIBILI (P2)**

**INDLOVULENKHULU/MASHI 2010**

**EMAMAKI: 80**

**SIKHATSI: 2½ ema-awa**

**Leliphepha linemakhasi lali-18.**



**TICONDZISO KULABAHLOLWAKO**

1. Fundza lelikhasi ngembikwekutsi ucale kuphendvula imibuto.
2. Ungalifundzi lonkhe liphepha lemibuto. Buka lokucuketfwe ekhasini lelilandzelako bese ubeka luphawu kulowo nalowo mbuto lobutwe ngetincwadzi lotifundze lonyaka. Emva kwaloko, fundza leyo mibuto lenetimphawu kuphela bese ukhetsa leyo lofuna kuphendvula yona.
3. Liphepha lemibuto licuketse tigaba LETINTSATFU:  
  
SIGABA A: Tinkondlo (30)  
SIGABA B: Inoveli (25)  
SIGABA C: Umdlalo (25)
4. Landzela ticondziso ekucaleni kwaleso naleso sigaba.
5. ISIHLANU IMIBUTO lofanele uyiphendvule seiyonkhe: Esigabeni A imibuto mitsatfu (3), esigabeni B munye (1), esigabeni C munye (1). Sebentisa luhlu lwekutikhumbuta kute usitakale.
6. Tinombolo tetimphendvulo atihambisane naleto temibuto njengobe tinjalo ephepheni lemibuto.
7. Cala lesa naleso sigaba ekhasini LELISHA.
8. Bhala ngesandla lesibonakalako nalesifundzekako.
9. Siphakamiso sekulawulwa kwesikhatsi:  
  
SIGABA A: Lokungenani emaminitsi langema-40  
SIGABA B: Lokungenani emaminitsi langema-55  
SIGABA C: Lokungenani emaminitsi langema-55

**LUHLA LWEKUTIKHUMBUTA:**

Lelikhasi litawusita bahlolwa ekukhetseni imibuto LABAFUNA kuyiphendvula ngaphandle kwekufundza lonkhe leliphapha lemibuto.

<b>SIGABA</b>	<b>TINOMBOLO TEMIBUTO</b>	<b>LINANI LEMIBUTO LEPHENDVULWAKO</b>	<b>THIKA</b>
<b>A: Tinkondlo</b> (Tinkondlo letifundvwe ekilasini)	1 – 4	2	
<b>A: Tinkondlo</b> (Inkondlo lengakafundvwa ekilasini)	5 – 6	1	
<b>B: Inoveli</b> (Indzabambhalo nobe imibuto lemifisha)	7 – 12	1	
<b>C: Umdlalo</b> (Indzabambhalo nobe imibuto lemifisha)	13 – 16	1	
<b>CAPHELA: Esigabeni B na C, phendvula YINYE INDZABAMBHALO NAMUNYE umbuto WEMIBUTO LEMIFISHA.</b>			

**SIGABA A: TINKONDLO****TINKONDLO LETIFUNDVWE EKILASINI****UMBUTO 1**

Khetsa tinkondlo tibe TIMBILI kuleti letilandzelako uphendvule ngato imibuto letawulandzela:

Fundza lenkondlo lelandzelako bese uphendvula imibuto letawulandzela:

- |    |  |
|----|--|
| 1  | Ababangaki labatiba buso bakho Ntfombi             |
| 2  | Ababonwa labatsi uma bahlala bakufulatsele Ntfombi |
| 3  | Ngikhuluma ngawe ntsandvokati yaketfu.             |
| 4  | Kuba kuvuka nje embikwakho kuyahlalwa              |
| 5  | Utikhinike ungakhatsali ungahhane                  |
| 6  | Temhlaba netemmamngo utikhipha ngeliphimbokati     |
| 7  | Sotilwimilwimi ntsandvose wababe.                  |
| 8  | Khewane ucoca nawe ahlekelele                      |
| 9  | Likhehla uliphulula imphandla likhumbule           |
| 10 | Likhumbula ebusheni kucine libunti                 |
| 11 | Litikhumbule lisayikhahlela yetinyawo              |
| 12 | Somidlalodlalo ntfombi yesive.                     |
| 13 | Ungumatfunywa avume sibili                         |
| 14 | Ungumacitsa situnge mbamba                         |
| 15 | Ungumantjilota longenamahloni nekuhleleka          |
| 16 | Ungumatsengisa ngenkhani etindlini tebantfu        |
| 17 | Ungumaphikelela wetimanga ntfombi yetimanga        |
| 18 | Wakho umkhuhlane ukhuba linyenti.                  |

Bhala indzatjana ucoce ngemcondvo lojulile walenkondlo.

Budze bemphendvulo yakho abube ngemagama langabi ngaphasi kweli-190 kodvwa kungabi ngetulu kwalangama-240.

**[10]****NOBE**

**UMBUTO 2**

Fundza lenkondlo lelandzelako bese uphendvula imibuto letawulandzela:

1 Vunulani makhangala nengcaye,  
2 Ngekufika kwelihlob' umyeni,  
3 Liniletsela lensha ingubo,  
4 Lenzala yavitsika yaphela,  
5 Ngengcilato yesigwadzi busika,  
6 Sinihlubula makhangala siningcunula,  
7 Nasala ningenangubo nihawulisa.

8 Umhlaba bewuhleti ungcono,  
9 Ingubo yawo leluhlata wemukiwe,  
10 Wemukwe busika sigwadzi semvelo,  
11 Ngumoya siyiphephetsa siyivitsita,  
12 Siyimbonya ngelichwa siyiwombisa,  
13 Yahhumbuka njengelumamadvu,  
14 Lwemfat' afelwe yindvodza.

15 Wo! Letfwese manje lihlobo!  
16 Ngiphakamis' emehlo ngabona  
17 Onkh' emakhangala savunula  
18 Letiluhlata tembatfo temvelo,  
19 Ngabona kuchakaz' imbal' etsafeni,  
20 Ngeva kuyiyitel' inyos' itsatsela,  
21 Ngeva kuntjilota tinyon' etulu.

2.1 Yini lengubo lakhuluma ngayo sonkondlo lapha emgceni wesitsatfu? (1)

2.2 Bunkondlo buni lobuvela ngemagama ladwetjelwe kulemigca lelandzelako?

Ingubo yawo leluhlata wemukiwe,  
Wemukwe busika sigwadzi semvelo, (1)

2.3 Sonkondlo bekakusiphi simo nakabhala lenkondlo? (1)

2.4 Ngabe lishoni ligama lekwengcayela? (1)

2.5 Sonkondlo ucondze kusitjelani kulemigca lelandzelako?

Ingubo yawo leluhlata wemukiwe,  
Wemukwe busika sigwadzi semvelo, (2)

2.6 Ligama lekuvunula ngabe sonkondlo ulisebentise kahle yini kulenkondlo?  
Sekela imphendvulo yakho. (2)

- 2.7 Bhala sinongo senkhulumo lesicuketfwe ngulomugca lolandzelako bese uchaza kutsi sibumbene kanjani nalenkondlo.

Yahhumbuka njengelumamadvu,  
Lwemfat' afelwe yindvodza.

(2)  
[10]

### NOBE

### UMBUTO 3

Fundza lenkondlo lolandzelako bese uphendvula imibuto letawulandzela:

- |    |   |
|----|---|
| 1  | Labakwatiko batsi:                      |
| 2  | Ulisango lemphilu,                      |
| 3  | Usihlutfulelo semphilu,                 |
| 4  | Ulitibuko lemphilu,                     |
| 5  | Ungumhlahlandlela wemphilu.             |
| 6  | Sango lemphilu yemuntfu,                |
| 7  | Vulela lusapho lwakaNtfu                |
| 8  | Lundlule luphangelane kuwe,             |
| 9  | Lugijime ngematubane lamakhulu          |
| 10 | Luyofinyelel' esicongweni sakaMfundvo   |
| 11 | Kulelibuswa ngungcondvonkhulu.          |
| 12 | Sihlutfulelo semphilu yemuntfu,         |
| 13 | Vuleka singene ngekhatsi                |
| 14 | Kuletindvongakati letinkhulu,           |
| 15 | Siyotsekela lwati lolujulile            |
| 16 | Sigogodze inhlakanipho yaleNshonalanga, |
| 17 | Sinots' emphefumulweni nengcondvweni.   |

- 3.1 Lenkondlo iluhlobo luni? (1)
- 3.2 Bhala ingcikitsi yalenkondlo. (1)
- 3.3 Bunkondlo buni lobuvetwa ngemagama ladvwetjelwe kulemigca lolandzelako? (1)
- Ulisango lemphilu,  
Usihlutfulelo semphilu,
- 3.4 Nguliphi lisu lebunkondlo lelisetjentiswe ngusonkondlo kulemigca lolandzelako? (1)
- Vulela lusapho lwakaNtfu  
Lundlule luphangelane kuwe,

3.5 Sonkondlo ucondze kusitjelani kulomugca lolandzelako?

Sinots' emphefumulweni nengcondvweni. (2)

3.6 Chaza kutsi ligama lelitsi 'sihlutfulelo' lihambisana kanjani nengcikitsi yalenkondlo. (2)

3.7 Sifundvo sini lesitfolakala kulenkondlo? (2)

**[10]**

### NOBE

### UMBUTO 4

Fundza lenkondlo lelandzelako bese uphendvula imibuto letawulandzela:

- |    |                                   |
|----|-----------------------------------|
| 1  | Ningizimu Afrika lenhle,          |
| 2  | Minyentana leminyaka,             |
| 3  | Liloku limile lelivi,             |
| 4  | Siloku simile lesimemetelo,       |
| 5  | Ngoba sifikile sikhatsi,          |
| 6  | Sekutsi wesifazane aphelele,      |
| 7  | Bufazane bakhe bufakazeke         |
| 8  | Kufakazelwe kuhlala kahle,        |
| 9  | Bufakazelwe yinkhululeko lenhle.  |
| 10 | Ningizimu Afrika lenhle,          |
| 11 | Sidze sikhatsi kukhalwa,          |
| 12 | Kukhalwa ngesamboko kubantfwana,  |
| 13 | Kukhalwa ngemphilo kubantfwana,   |
| 14 | Lokushisa buhanguhangu.           |
| 15 | Lokushisa kushe nalobekusamila,   |
| 16 | Kusale ticintsi letome nkhwa,     |
| 17 | Letingay' usumila nanini,         |
| 18 | Ngako-ke Ningizimu afrika lenhle, |
| 19 | Hamba nesikhatsi.                 |
| 20 | Phila nesikhatsi.                 |
| 21 | Ngalenyatfuko lenje               |
| 22 | INingizimu Afrika lenhle,         |

4.1 Bhala umusho loyimphindwa kulenkondlo. (1)

4.2 Shano luhlobo lwesifanamsindvo kulomugca lolandzelako. Bhekisa etinhlavini letidvwetjelwe.

Bfazane bakhe bufakazeke. (1)

4.3 Chaza kutsi sihloko salenkondlo sihambisana kanjani nalokushiwo ngulenkondlo. (2)

- 4.4 Bhala luhlobo lwesinongo lolucuketfwe ngulomugca lolandzelako nekutsi sonkondlo usisebentise kahle yini?

Ngalenyatfuko lenje.

(2)

- 4.5 Bunkondlo buni lobuvelwa ngemagama ladvwetjelwe kulemigca lelandzelako?

Kukhalwa ngesamboko kubantfwana,  
Kukhalwa ngemphilo kubantfwana,

(2)

- 4.6 Sonkondlo ucondze kusitjelani kulemigca lelandzelako?

Ngako-ke Ningizimu Afrika lenhle,  
Hamba nesikhatsi.  
Phila nesikhatsi.

(2)

[10]

## TINKONDLO LETINGAKAFUNDVWA EKILASINI.

### UMBUTO 5

Phendvula munye umbuto kulena lelandzelako:

- |    |  |
|----|--|
| 1  | Lapho sengidzabule tifundza                |
| 2  | Nemave, tigodzi netilwandle                |
| 3  | Ngafundza kusho nangetilimi tetive         |
| 4  | Ngijoyabula kuphefumula ngawe,             |
| 5  | Wena wedvwa lwimi lwami                    |
| 6  | Lapho sengihacwe sicuku,                   |
| 7  | Sekufanele siphose litje encumatsini       |
| 8  | Ngivakalise kugaya kwenhlitiyo nengcondvo, |
| 9  | Inhlitiyo seyigubhutela esifubeni,         |
| 10 | Igcwel' iphuphuma,                         |
| 11 | Vuma lwimi lwami ngiphefumule ngawe.       |
| 12 | Namatsela lwim' emlonyeni wami             |
| 13 | Kugcware kuchichime tinhlavu tenkhulumo    |
| 14 | Letivunywa nguwe:                          |
| 15 | Ngikwati kuceketsela Ngwane wonkhe ngawe,  |
| 16 | Ngako lokuvela ekujuleni kwemcabango.      |
| 17 | Ungangishiyi lifa lami,                    |
| 18 | Namatsela kimi busika nehlobo,             |
| 19 | Ubambeke ngemtfwebeba nenovi               |
| 20 | Lesuk' ebuveni lobuyinsika yami.           |



- 21 Sengihize tekufika,
- 22 Ngabopha intsamo ngayihilela:
- 23 Sengibhabhalel' enomfonomfeni yekufika,
- 24 Sekuvimbanise bukhatikhati nebumanyamanyama-
- 25 Hlala lwimi lwami ngiwakho.

Bhala indzatjana ngaloko sonkondlo lakhuluma ngako kulenkondlo lengenhla.

Budze bemphendvulo yakho abube ngemagama langabi ngaphasi kweli-190 kodvwa kungabi ngetulu kwalangama-240.

[10]

### NOBE

#### UMBUTO 6

Fundza lenkondlo lelandzelako bese uphendvula imibuto letawulandzela:

- 1 Hhayi boNgwane, ngikhashane nekhaya,
- 2 Ngidzabul' ematsafa ngabaseJozi,
- 3 Lapho ngibon' insimu i-Avalon,
- 4 Lapho kunisel' imvula yetinyembeti.
- 5 Hhayi boNgwane kuyalinywa la.
- 6 Kulinywa live kuhlanyelwe ekujuleni,
- 7 Lapho kungefiki mphandze
- 8 Yamkhiwa, umganu, nemkhuhlu.
- 9 Kuyalinywa e-Avalon yaseSowetho
- 10 Kulinywa busika nehlobo.
- 11 Kulinywa ngelipiki nelifosholo,
- 12 Kuhlanyelwa ngempheleasantfo.
- 13 Hhayi maNgwane lemvula yetinyembeti
- 14 Yenyelis'umtimba ugodvole.
- 15 Tiyadzilika kubafelokati nemadvodza,
- 16 Bantfwana, emabhungu netintfombi.
- 17 Uyasho ngesizotsa umfundisi:
- 18 "Kulelitako akunatinyembeti nalusizi
- 19 Buhlungu nasifo-siyohlala kwaphakadze."
- 20 Bayatesula,betsembe, bamutsi njo emehlweni.
- 21 Ngivile ngebefiki lebebakhasa
- 22 Bahlonipha letizilile tincola,
- 23 Tendlula ngasemitini ticondze e-Avalon.
- 24 Sebayobuk' emadvolo, abasakhasi!

6.1 Caphuna umugca esitanzeni sesibili lapho kusetjentiswe khona sidvonsamoya.

(1)



- 6.2 Shano bunkondlo lobakhiwa ngulamagama ladvwetjelwe kulemigca lemibili lelandzelako:  
Hhayi boNgwane kuyalinywa la.  
Kulinywa live kuhlanyeke ekujuleni, (1)
- 6.3 Lapha emgceni welishumi nakutsatfu, yini lebangela sonkondlo atsi:  
'Lemvula yetinyembeti?' (1)
- 6.4 Nguletinjani letincola letizilile lakhuluma ngato sonkondlo lapha emgceni we-22? (1)
- 6.5 Hluta lomugca wenkondlo lolandzelako ubhekise egameni leladvwetjelwe:  
'Kulinywa live kuhlanyelwe ekujuleni,' (2)
- 6.6 Chaza kutsi ufuna kutitjelani tetsamelilwati takhe sonkondlo ngalomugca wenkondlo lolandzelako:  
'Kuhlanyelwa ngemphelasontfo.' (2)
- 6.7 Bhala KUNYE lokubi NAKUNYE lokuhle lokungabangelwa nguloku lakhuluma ngako sonkondlo kulenkondlo lengenhla. (2)

**[10]****SAMBA SIGABA A: 30**

**SIGABA B: INOVELI**

Kulesigaba kunemanoveli lamabili. Wena-ke khetsa ibe YINYE loyifundze ekilasini lonyaka uphendvule ngayo.

**CAPHELA:**

Khetsa emkhatsini WENDZABAMBHALO NEMIBUTO LEMIFISHA kuleyo naleyo noveli loyifundzile. Kumele uphendvule nobe ngumuphi umbuto ube MUNYE *ngaleyo noveli loyifundzile*. Uma ukhetsa kuphendvula umbuto wendzabambhalo kulesi sigaba, uphokelelekile kutsi ESIGABENI C uphendvule imibuto lemifisha.

**LIPHUME NEBOVU – B B Malangwane****UMBUTO 7**

Bhala indzabambhalo uhlahlele kutfutuka kwesakhiwo salenoveli usho nekutsi umbhali uphumelele kangakanani kubhala sakhiwo senoveli lesemukelekako.

Indzabambhalo ayibe nemagama langabi ngaphasi kwema-340 kodvwa angabi ngetulu kwalangema-390.

**[25]****NOBE****UMBUTO 8****IMIBUTO LEMIFISHA**

8.1 Fundza lethekesthi leyincenye yendzaba bese uphendvula imibuto letawulandzela:

"Sinibona nani Mntungwa ngalelifu lelimnyama lelisibekela umuti wakho."  
 "Singayitsini Kunene imisebenti yebatsakatsi, loku nabo basebentela uyise Sathane."  
 "Kodvwa lentfo nayentiwe ngumuntfu ngabe unesibulawela lesibi ngifunga eMantimandze."  
 "Mine sengilihambe ngalicedza Kunene, futsi nanyalo ngisetawulihamba ngifuna bona bogobela labangahle banginike likhambi. Umtsakatsi ngidla naye liphilishi, akekho khashane."  
 "Kodvwa indzaba lenjena iyaye yentiwe njani Khumalo? Bona bemanga batsini?"  
 "Mine sengiticedze tonkhe tinyanga kanye nebapholofithi ngaletigigaba letivela kulomuti wami. Tonkhe tingitjela intfo yinye. Taze tangitjela nekutsi lomtsakatsi wacala ngekungibulala inhliyo. Uze ubone kutsi vele ngangifile, kwatsi noma asatele liphumalimile ngamcolela. Lenzaba yaba sifuba setfu sobabili ngobe yenteka ngalesikhatsi sihlala naye eJozi."

8.1.1 Lifu lini lelimnyama lelalishiwo nguKunene nakakhuluma naLushawulo? (1)

8.1.2 Lani lelikhambi lelifunwa nguKhumalo kubogobela? (1)



- 8.1.3 Abecinise kangakanani Khumalo kutsi umtsakatsi abedla naye liphalishi? (1)
- 8.1.4 Yagcina isombululeke kanjani lenkinga labebukene nayo Khumalo? (1)
- 8.1.5 Ucabanga kutsi yini leyabangela Khumalo kutsi ahlale nemfihlo yeliphumalimile laLaMaseko? (1)
- 8.1.6 Fakazela lesaga lesitsi, 'lutsandvo aluboni,' ngasinye setigigaba letenteka kulenovel. (1)
- 8.1.7 Uma ufundza lethekesthi lengenhla kuyabonakala kutsi inkholelo yaKhumalo itinhlangotsi letimbili. Tibhale letinkholelo bese uyatihumusha. (4)

8.2 Fundza futsi lethekesthi leyincenye yendzaba bese uphendvula imibuto letawulandzela.

Liyasha litje kuLaMagagula edladleni, sewusilela tilalelo. Usila nje akakabindzi ngenhlitiyo uyabalisa. "Kuyini kwendza? Kuyini kantsi kuphila? Kodvwa mine sengiphilelani nje nempela ngoba ngisha busuku nemini? Kodvwa batali bami abasangihawukeli ngani bangiphumute kulesihogo lengikuso? Maye make abengitjela bo kutsi impfumakudze ngiyifunani, lesichwichwi nekwenta." Atime setigcwala emehlo, kuye kanye etfuke setishisa etihlatsini. Ayekele kusila, agobe sidziyana sakhe lesasicedvwa ngemanti, atesule kanye nemafinyila labetipheleketela. Noma etama kutesula tinyembeti temihla, letinye noko tativele ticatsakele emphushini. Ukhala nje uyati nekutsi nalowo mmbidlana labewusila wawuwekugcina. Nawo phela abekhangetwe ngudzadzewabo naye angulomunye lotidlembelako. Kati abesalala etiko cobo lapha kaLushawulo. Ingani phela naye abengasati nekutsi kodvwa kukhonani layishiya ekhaya. Utsite asasila LaMagagula weva lokwebantfwanyana kwakhe sekukhalisana kubanga sikhokhwana sencwancwa labasukusule ngayo.

"Kodvwa Khetsile ubakhaliselani bantfwana?"

"Akusimi make ngunangu Todvwa udlela umntfwana sikhokho sakhe."

- 8.2.1 Ngubani lesichwichwi lakhuluma ngaso LaMagagula? (1)
- 8.2.2 Ekwendzeni kukamkhatsali. Fakazela lesaga ngekucaphuna kulethekesthi lengenhla. (1)
- 8.2.3 Yasonjululwa kanjani lenkinga labebukene nayo LaMagagula? (1)
- 8.2.4 Nika sibonelo setigameko leticuketse ludvweshwu lwangaphandle neludvweshu lwangekhatsi kulethekesthi lengenhla. (2)
- 8.2.5 Umlingisi lomcoka uvetwe ngempumelelo lenganani kulenovel? Chaza. (2)

- 8.2.6 Bhala tigateko LETIMBILI kulenovelile letingakholeki kahle letingengetinganekewane. (2)
- 8.2.7 Hlahlela kubumbana kwesiphetfo salenovelile neligama layo. (2)
- 8.2.8 Kube ngabe labantfwana baLaMagagula bebaphila kulesikhatsi salomuhla ngabe abasiboni lesimo labakuso. Vumela nobe uphikise lombono uphindze wesekele. (2)
- 8.2.9 Inkhulumo letsi, imbilapho ivuna silondza iyimfundzisolite nawubuka imphilo yaLushawulo nenina. Hlatiya. (2)

**[25]****KUBAMBA LETINGELAKO – DE Nkosi****UMBUTO 9**

Ngabe umbhali walenzaba wabhalela tetsamelilwati takhe indzaba lemnandzi nje kwekuba tiyifundze nobe kukhona lokunye labekuhlosile ngalenzaba? Bhala indzabambhalo uvete wakho umbono.

Indzabambhalo ayibe nemagama langabi ngaphasi kwema-340 kodvwa angabi ngetulu kwalangema-390.

**[25]****NOBE****UMBUTO 10****IMIBUTO LEMIFISHA**

- 10.1 Fundza lethekesthi leyincenye yenzaba bese uphendvula imibuto letawulandzela:

"Yekela kucamba emanga wena! Kuyatiwa kutsi bewusejele yonkhe leminyaka kanye neyihlo. Make wakho ushona siyamngcwaba nisejele nine. Sikolo angeke sikwati kuchubeka nekufundzisa siboshwa lesifana nawe, ngako-ke sicela kutsi udedele bantfwana labanemarekhodi lamahle bafundze. Siboshwa nemfundzi bantfu lababili labehlukene labo. Sishiye ngekuthula lapha ngoba utawufundzisa bantfwana imikhuba lemibi.

- 10.1.1 Shano wakho umbono uwubhekise kulamavi lalandzelako:

"Yekela kucamba emanga wena!"

(2)

- 10.1.2 Ngekubona kwakho ngubani imbangi lenkhulu yaMphikeleli kulenzaba? Usho ngani?

(2)

- 10.1.3 Ngabe ngumbono yini nobe liciniso kutsi Mphikeleli abesejele? Sekela umbono wakho.

(2)



- 10.1.4 Bekahloseni umbhali walenzaba ngekubhala lethekesthi lengenhla? (2)
- 10.1.5 "Umona usuka esweni uye enhlityweni." Shano kwekutsi lesaga sihambisana kangakanani nalethekesthi lengenhla. (2)
- 10.1.6 Catsanisa lethekesthi lengenhla nesiphetfo salenzaba. (2)
- 10.1.7 Intsandvo yelinyenti ivetwe kanjani kulenzaba? Hlatiya. (3)
- 10.2 Fundza futsi lethekesthi leyincenye yenzaba bese uphendvula imibuto letawulandzela:
- "Kufuneka emasu ekuyicedza imikhukhu. Bantfu bakitsi batawuhlala elaleni kuze kube nini? Kumele babhaliswe kahle bonkhe, bese bayakhelwa. Kufanele bakhelwe tindlu letinhle, leticinile futsi letihehako. Akufuneki kutsi kwakhiwe ngobe kucedvwa licala. Kumele kube tindlu labatishaya tifuba ngato. Bangatsi 'sibonga loku lesakhelwe kona nobe kukuncane.' Akucatjangelwe titfunti tebantfu ngekutsi bakhelwe tindlu labangeke batikhobose ngato. Kumele kungafani nakadzeni lapho bebakhala ngekutsi bakhelwe emadoshi emetjiso nobe emathoyilethi kwase kutsiwa tindlu. Indlu kumele kube yindlu sibili futsi ibonakale,"
- 10.2.1 Chaza simonhlalo sesikhatsi salenzaba ubhekise kulethekesthi lengenhla. (2)
- 10.2.2 Chaza lomlingisi lokhuluma lamavi lakulethekesthi lengenhla. (2)
- 10.2.3 Lesihloko salenzaba lesitsi "Kubamba Letingelako" siyifanele yini lenzaba? Hlatiya. (2)
- 10.2.4 Wena ucabanga kutsi luvutfondzaba lwalenzaba lukuphi? Sekela. (2)
- 10.2.5 Hlola imicabango netincumo tembhali ubhekise kulamavi lalandzelako:
- 'Kufanele bakhelwe kahle bonkhe' (2)

**[25]****SAMBA SIGABA B: 25**

**SIGABA C: UMDLALO**

Kulesigaba kunemidlalo lemibili. Wena-ke khetsa ube munye lowufundze ekilasini lonyaka uphendvule ngawo.

**CAPHELA:**

Khetsa emkhatsini WENDZABAMBHALO NEMIBUTO LEMIFISHA kulowo nalowo mdlalo lowufundzile. Kumele uphendvule nobe ngumuphi umbuto ube MUNYE *ngalowo mdlalo*. Uma ukhetse kuphendvula umbuto wendzabambhalo enovelini, uphokelelekile kutsi kulesigaba uphendvule imibuto lemifisha. Uma ukhetse kuphendvula imibuto lemifisha enovelini, uphokelelekile kutsi kulesigaba uphendvule umbuto wendzabambhalo.

**KWAHLWA EMINI – JJ Thwala****UMBUTO 11**

Bhala indzabambhalo uchaze kubumbana kwesimonhlalo salomdlalo nengcikitsi yayo.

Indzabambhalo ayibe nemagama langabi ngaphasi kwema-340 kodvwa angabi ngetulu kwalangema-390.

**[25]****NOBE****UMBUTO 12**

Fundza lethekesthi lelandzelako bese uphendvula imibuto letawulandzela:

Ntfwasahlobo:	Ngangena mine Ntfwasahlobo. Ngangena mine longena emitini kuthule dvu. Ngiyati nikhuluma ngetebukhosi. Ngimi lengitawube ngibekwa esikhundleni ngeMgcibelo, ngobe niyabangisana. Kuyawuze kube nini nibanga bukhosi? Kutsatfwa kwesikhundla ngekuthula sakugcina ngaMkhalelwa.
LaJele:	Maye uyatitsandza tindzaba letingakakufaneli Ntfwasahlobo. Wo, kenje sekusentfwasahlobo sekuvukile lokuhlanya kwakho lokuhambisana nekuhluma kwetihlahla.
Ntfwasahlobo:	Vele banyenti labacabanga kutsi ngiyahlanya, kantsi ngiphile saka! Kuhlakanipha loku lokungenta ngati tindzaba letinkhulu. Tindzaba letinkhulu tatiwa bantfu labakhulu njengatsi.
LaJele:	Umcondvo wakho wonakala wena Ntfwasahlobo. Yini ndzaba bakini bangakwelaphisi.
Ntfwasahlobo:	Ngikutjelile ngatsi ngiphile saka! Umuntfu lengisola kutsi uyagula ngulowo lowehluleka kutjela umntfwanakhe emaciniso.
LaJele:	U-utsini Ntfwasahlobo? U-utsini?
Ntfwasahlobo	Ngitsi kuhle sitjele bantfwabetfu emaciniso odvwa. Singabetsembisi tikhundla letingasito tabo.



- 12.1 Ngutiphi letindzaba tabukhosi lakhuluma ngato Ntfwasahlobo? (1)
- 12.2 Chaza kudlaleka kwalesicashunwa esiteji. (1)
- 12.3 Sifundvo sini lesisitfolo kulomdlalo? (1)
- 12.4 Lamavi aLaJele latsi "Maye uyatitsandza tindzaba letingakakufaneli" ahambisana kangakanani naloku lokwenteka lapha emphakatsi? Sekela imphendvulo yakho. (2)
- 12.5 Ngabe kungumbono nobe emaciniso yini kutsi kuhlanya kuhambisana nekuhluma kwetihlahla. Usho ngani? (2)
- 12.6 Letheksthi lengenhla ngabe iwutfufukisa kangakanani lomdlalo. Chaza kabanti. (2)
- 12.7 Hlatiya lenkhulumo lekuletheksthi nesiphetfo saNkhanise? (2)
- 12.8 Esikhatsini lesinyenti teluleko tebantfu tingakufaka emgodzini. Fakazela lombono ubhekise kulokwentiwa nguLaJele. (2)
- 12.9 Kungati kufana nekungaboni. Sekela lombono ubhekise etelulekweni taSicongo naNdleleni labatinika Nkhanise. (3)
- 12.10 Buka sento saLaJele naMkhalelwa sekuhlala nemfihlo sikhatsi lesidze usicatsanise nesimo semindeneni lesiphila nayo lomuhla. (3)
- 12.11 Hlatiya lenkhulumo yaNtfwasahlobo latsi "kuhle sitjele bantfwabetfu emaciniso" uyibhekise encwadzini yonkhe. (3)
- 12.12 Ayihlabi ngakumisa. Chaza lesaga ubhekise etinkhulumeni nasetentweni taNtfwasahlobo. (3)
- [25]**

### UMVUZO – NS Nzima

#### UMBUTO 13

Umbhali walomdlalo usebentise indlela yekucamba badlali bakhe emagama, indlela labakhuluma ngayo netento tabo kuveta kutsi babadlali labanjani. Bhala indzabambhalo lesekela lenkhulumo lengenhla ubhekise kuBatjele, Mlandzeli naSatile.

Indzabambhalo ayibe nemagama langabi ngaphasi kwema-340 kodvwa angabi ngetulu kwalangema-390.

**[25]**

**NOBE**





**UMBUTO 14**

Fundza lethekesthi lelandzelako bese uphendvula imibuto letawulandzela:

Batjele:	Lusuku lwakusasa lwemancamu sibili. Lusuku lwentfokoto kulabo bebasebenta ngekutimisela, lusuku lwelusizi kulabo bebangatimiseli. Kudzela lowatiko kutsi imiphumela iyewuphuma ephephandzabeni injani.
LaMbuli:	Sibambe umoya mntfwanami. Akukho lesikwatiko tsine, kwati losetulu. Yonkhe indzawo kukhulunywa ngemiphumela lelindzelwe kusasa. Siyawukwamukela nobe yini levelako ndvodzakati.
Batjele:	Kuvuna lotjalile make. Ngikwentile konkhe lokusemandleni ami ngenhloso yekutsi ngiphumelele. Umnyaka lona uye waba lukhuni etimphilweni tetfu ngoba kusukela ngaBhimbidwane besibhimbidzela incwadzi. Sifike kuMabasa sibasa incwadzi. Inyoni phezukwemkhono nobe Kholwane beyitsi nayikhala itsi 'Phezukwemkhono! Phezukwemkhono!' kitsi beyihumusheka itsi etikwencwadzi njalo.

- 14.1 Uma ulalela tinkhulumo taBatjele nenina kuyabonakala kutsi Batjele akanaluvalo ngemiphumela. Bhala saga lasisebentisile lesikhombisa loko. (1)
- 14.2 Sive besitawatiswa ngayiphi indlela ngemiphumela yaboBatjele? (1)
- 14.3 Bhala ingcikitsi yalomdlalo. (1)
- 14.4 Yini lebangela LaMbuli atsi babambe umoya ngalemiphumela? (1)
- 14.5 Hlobo luni lwemfundvo lolufundvwa lapha kulesikolo saseMkhuphukantsaba? (1)
- 14.6 Sifundvo sini lesifundvwa kulenkhumalo yaLaMbuli naBatjele? (1)
- 14.7 Lomdlalo uvule emehlo netingcondvo tetetsamelilwati tawo ngebudlelwano emkhatsini wemphilo yasesikolweni nemphilo yangaphandle. Nika tibonelo LETIMBILI letifakazela loko kulomdlalo. (2)
- 14.8 Lutfolakala kuphi ludvweshu kulomdlalo? Nika luhlobo LUNYE nesigameko SINYE lesifakazela imphendvulo yakho. (2)
- 14.9 Lusha lunetikhatsi lapho luphuma khona endleleni yetimiso letemukelekile emmangweni. Sekela lombono ngesigameko lesitfolakala kulomdlalo. (2)
- 14.10 Batali labahle ngulababamba lichaza emfundvweni yebantwana babo. Phawula ngalombono ubhekise kuLaNgwenya. (2)
- 14.11 Hlahlela simonhlalo salomdlalo ngemaphuzu LAMABILI. (2)
- 14.12 Siphetfo salomdlalo ngabe sibumbene kangakanani neligama lawo? Chaza. (2)

- 14.13 Lwati lwendzabuko luyintfo lemcoka etimphilweni tebantfu. Ngabe umbhali walomdlalo ukwetfule kanjani loko ebantfwaneni baseMkhuphukantsaba? Chaza. (3)
- 14.14 Bhala emakhono LAMABILI lagcugcutelwe kulomdlalo kukhutsata bafundzi ngelikusasa labo, bese uyasho kutsi likhono ngalinye ligcugcutelwe ngayiphi indlela. (4)  
[25]

**SAMBA SIGABA C: 25**

**SAMBA SAKO KONKHE: 80**